

## Angig Mo Pita Ginofena

### *Ohuna buk enaig esog*

Ohuna bukba sihigba emba Kristen elim kwa-ganigim afa ehengelni olug onigigim kifutihi-anugi so kinig nalog kahlig. Afa enaig sihifeg, Kristen el so ma piske onigi Sisas Kraisa na lahlag mom. Enag mo eba enaig sihifeg. Sisas wahagim afa piske buhiagim afa ehe ohunaig sihifeg wahiag, ehe piske bof. Ehengel so ma hugna onigafafi so ehe heafna mo sihi wahiag enam ningafafum ehe piske bof. Eba inim enag Kristen el kinig kahlig, eba Kristen na olug onigigim gihnag og, so ma olug oniginam kifuti agfofiba so ma ikagna Kraisa piske boi. Afa enanam ehengel lahlag augu fif.

<sup>1</sup> Afa ka Pita Sisas Kraisa kanog wahiag el. Afa nengel Ju el Sisasim olug onigig na ka nem ohuna mo faig. Afa el nem fegonigigbi eso ne nimbeafna kimbigim wahigim mingnag kimbig gam ikaminefeg. Afa yawo nengel provins Pontus afa Galesia afa Kapadosia afa Esia afa Bitinia enanai yi gohka.

<sup>2</sup> Afa autunam God Humuan nengelim gishug hwatig so na Sisas Kraisa mo pahlukuiba eso heafna tafna nem gigiafeni. Afa Godna Sungwag so ma nem esenibi eso ne afsug el fi. Afa ka membeg so ma God nem hugna isug kwaganig i afa olug efihlag i fai.

*Lahlag nofekikenagag bigim heven wa nisana go*

<sup>3</sup> Eso big God eba Ainiyag Sisas Kraisna awagim lahlag oni. Afa ehe bigim nalog afafenigim eso Sisas Kraisim ningihiagim afa ehe piske bitekfe nai ilafu fatig. Afa enaba God bigim mulug nofkenagag faig. Afa big ati anwanafig Godna mo sihi wahiag eba ehe inim esef.

<sup>4</sup> Afa lahlag gawig God bigim ogra fai eso big enam yawo nisanago. Afa God enam heven wa faka wahiag afa enanai yiba eba mas nogi afa amtakwale afa awaie.

<sup>5</sup> Afa nengel Sisasim olug onigigbi eso God heafna kifutigni nem kagwo wambufiego afa sumi yi osuna ehe nem ambagwa piske wambuiba eso ne lahlag augufef.

<sup>6</sup> Afa enam ne onigigim eso ne sifakalig. Afa yawaba mwakwalig ne ahanaig ahanaig kinig yi tautig fig.

<sup>7</sup> Afa enag kinig nengelni olug onigigim gihni fi inim me awai awai me. Afa el golim suwi wa tuhlugba og so ma inim gol pugu. Afa enag golba mas higege gofi. Afa nengelni olug onigig golim gosenag afa kinig nengelni olug onigigim gihnigba eso ma enaba olug onigig higege gofuf. Afa mahim enanam Sisas Krai ambagwa puguiba afa so ehe nem sifakalinim nengelni unehlagim fingi fenif.

<sup>8</sup> Afa nengel ehem mas nangug mo afa ne ehe nai yi hugna onigig luwaba afa yawo nengel ehem nangu hwainig fig afa ne ehem olug oniginigim eso ne sifakalig. Afa enag sifakaligba

ohuna bite nai sifkalim gwesim hilifenag enaba mo mas yuhwa wagfui.

<sup>9</sup> Afa ne Sisasim olug onigig wa kehla guba eso God nengelim wambugofufiba afa eba ne lahlag agfofufe.

<sup>10</sup> Afa Godna mo fi sihiaule el sihini og Godba nengelim ismunagim kwaganif. Afa enag el mogim yisigigim afa fahiginim ahana mina bigim Godba piske wambuf.

<sup>11</sup> Afa autunam Kraisna Sungwag ehengelim sahoguhun finiba eso mo ehengelni mengig wa enaig sihifeni og yuwanaba Kraisa eba tautig fanam eso sumi mo ehe nalog unehlag nemug fafe. Afa ehengel sahani og, eba aman mahim afa ahnana so puguf?

<sup>12</sup> Afa God ehengelim mo fi sihiaule elim wagfunig afa heafgelni gafugag eba mang hefum mo eba nengelim sumi naim kwaganig. Afa ehengel ena mo sihinibi afa yawo ne gwenag mo higig. Afa God heafna Sungwag heven wa naim ningihiagba eso heafna kifutig yi el Godna lahlag mo sihigbi afa ne gwenag mo higig. Afa mang lahlag God so bigim esinigbi ofwanai el ogra enam anwanafi.

### *Sa big afsug kabag el fi*

<sup>13</sup> Masa nengelni onigig ahanaig ahanaig wa ikaminefenif so na Sisasna mo numweheg kehlakufiba eso ne nof feagegofim. Afa so na gunag onigig wa agfohieffiba eso ne nenge agfofum eba mahim Sisasa Kraisa afwambusug yi puguiba eso God nem ismunagim kwaganif.

14 Afa so na Godum higina ofenaiba lahlag luwal. Afa nimbeafna sawieg nengel nai yi go mahim nem anwana gohug hwainig fenagba nofeka enam pahluku.

15 Afa God nem awamonag eba ehe afsug kabag el feg. Afa nengelni nihe gaba so ma gwenaig afsug kabag fe.

16 Afa Godna ginof enaig esog;

Kaba afsug kabag feg eso ne gaba gwenaig afsug kabag fi. *Wkp 11:44,45*

17 Afa mahim nengel Godum ahsahnifibi eso enaig sefifif Humuan. Afa God elni ahanaigim fahigeagegim eso mungwali elim mungo mina kwefihianugeg. Afa so na onigi ohuna bite mang nimbeafgelni mo eba mahim ne nofkenagag gofiba so na enaig onigif, masa kam God kwefihianagef eba kana nihe so mas lahlafeg mo.

18 Afa autunam ne nimbeafgelni simbianigana nihe mo wa ne gofena afa enag nihe nem mas kwagana mo afa so nem God enanai wambug. Afa ehe mang bitenai gauna silva afa golna esei mo amo enaig eba sumi yi amtakwalig esaif.

19 Eba Kraisna taf hugna numwehe fukog enana God nem wambug. Afa Kraisa ofenaiba sipsip luwalig mang ehem feg hwainig eso Ju el sipsip tigi tuhlu Godum faig lofeg.

20 Afa mahim God bitem gafugafeg hwainig mahimsi fiahfenaba afa enanam Kraisim ati kanog wahiana. Afa ohunag osuna eba sumi yi osuna eso Kraisa ambagwa ati puguagim nengelim kwaganig.

21 Afa ne Kraisna mo kehliligim eso ne Godum

olug oniginig. Afa God ehem bitekfe nai ilafu fatigim unehlag nalog faig. Eso ne Godna mo oniginigim afa ne nenge agfodef ehe heafna mo eseba ini pugufef.

<sup>22</sup> Afa ne ini mo higigim pahlugugba eso ne afsug fig afa ne Kristen nilitem membegonug. Afa enag membug onigig so ma nengelni olug yi gofi.

<sup>23</sup> Afa Godna mo eba nofkenagag mo gwese higeg gofuf. Afa enag mo nem fukwag mulug nofkenagag faig afa ofenaiba awag mas wahai.

<sup>24</sup> Afa Godna mo enaig esog;  
Mungwali el pos lofug eba mwakwalig agfohie afa ehengelni lahlag gawig pos sisig lofug eba awaienif.

Afa pos fofenam afa pos sisig bubughia apaigofe,  
<sup>25</sup> afa Ainiyagna moba gwese higeg gofuf. *Ais*

*40:6-8*

Enag mo eba Godna lahlag mo el nem sihigonug.

## 2

### *Ainiyag eba nofkenagag sumil feg*

<sup>1</sup> Afa so na mungwali amtakwalig nihem masigim fati. Afa nofeka mwakwal mo sihi afa sambaga mengigna fi afa ambobugiagi fiagi afa elim sehi.

<sup>2</sup> Afa luwal ninganai mas mangim onigi eba ehe tutum mungo membenag afa ne gaba so na Godna inim fanem membena. Afa enag fane nengelni sungwagim kwaganiba so ma kifutig fei eso ne yuhwafenam so na God i lahlag ahagag ahfe.

<sup>3</sup> Afa Godna mo enaig esog, “Ati ne nangug Ainiyagna nihe eba lahla feg.”

<sup>4</sup> Afa Ainiyag eba sumil nofkenagag feg afa el ehem fahige finim og eba amtakwalig. Afa God ehem fahige fiafagim og, eba lahlag eso ehem kanog wahiagba eso big ehem nangum ahu.

<sup>5</sup> Afa nengel gaba nofkenagag sumil fig afa Godna Sungwagni kifutig yi ehe oagna nem esenibi eso ne Godna lala fif. Eso nengel afsug pris fig afa Kraisna unehlag wa so na lahlag nihe Godum faig ofenaiba pris so Godum sis tulhu faini.

<sup>6</sup> Afa Godna mo enaig esog og;

Sa higim, autunam ati ka lahlag sumil kanog wahiana

eba mingnagim gosinig afa hugna lahlag lala sumil feg eba ka Saion kimbib fakag.

Afa amangel ehem olug oniginibi eba mas ahwanifi. *Ais*

*28:16*

<sup>7</sup> Afa amangel so na olug onigig enag sumil eba nengelim lahlag nemug fenig afa amangel mingnag mas olug onigig mo enaba ming mo enaig esog;

Afa lala nimblag el sumilim fahigenagigim og eba amtakwalig sumil eso isugum fatig.

Afa sona sumil eba ehe gosugum afa hugna lahlag lala sumil lofug feg. *Sam 118:22*

<sup>8</sup> Afa ming Godna mo enaig esog;

Afa enag sumil eba enaksag elim mwolkel fetife gofiba

eso el ena sumil mogug yi apaigof. *Ais 8:14*

Eba ehe Godna mom fingi fatigbi naso ehengelim mwolkel fetife go. Eba autunam God ati anwanafe wahiana eba enaig esif.

<sup>9</sup> Afa nengel eba God ati nem kanog hwatig afa God ehe misog el feg afa nengel heafna pris fig afa ne afsug kabag el figim afa Godna el fig. Afa ehe nengelim enaig esinigi eso ne heafna lahlag gafugagim ambagwa sihiagi. Afa ehe nengelim awamonugbi eso ne sikifig wa nai wahinim heafna lahlag afwambusug nemug gam ambugog.

<sup>10</sup> Yuwana ne mas Godna el fini mo afa yawo ne heafna el fig. Afa yuwana mas ne heafna afafegim anwanafini mo afa yawo ati ne fig.

*Eso big misog elim ahnai skaufegon*

<sup>11</sup> Kana hihe, mahim big ohuna bite wa auguiaba so big onigigim ohuna bite eba mang bigelni mo. Eso ohuna bite nai amtakwalig onigig elig oagna ese, eso nofeka enam pahluke. Eso enag onigig nengelni sungwagim bigagafego.

<sup>12</sup> Afa nengelni nihe afwambanai elni nof wa so ma lahlag nemug fei. Afa mahim ehe nem mwakwal sehtigifibi eso mungwali el anwanafi nengelni nihe eba lahlag eso enag osuna God obofiba ehengel ehena unehlagim fingi fif.

<sup>13</sup> Afa so na Ainiyagim onigigim eso ahanaig ahanaig bite nai misog elim ahnai skaufegon. Afa so na gavmanna misog elim ahnai skaufegon eba heafna mo sisyi feg.

<sup>14</sup> So na gavmanna gafugag elim gaba gwenaig esegon. Afa misog el ehengelim ningitigiba eso amtakwalig elim tautig faigogim afa lahlag elni unehlagim mo fingi fig.

<sup>15</sup> Afa God enaig membeg og, ne lahlag nihe esigbi eso enaba anwana hwainig elim ahwanefug

faig eso ehe mengig pwakafegim afa ehe mas amtakwalig mo sihi.

<sup>16</sup> Afa God nem og, se eseahufum eso nofeka enaig onigigi ne og ati ka enaig mo fag eba ka amtakwalig esef. Amo, so na Godna isug gafugag el agfohie.

<sup>17</sup> Afa so na mungwali elim lahlafegon, afa Kristen nilitem hugna membegon, afa so na Godum bwata ningmanginim eso ahnai skaugfini afa gavmanna misog elim lahlafeni.

*Krais tautig fag eso big gaba gwenaig esi*

<sup>18</sup> Afa ne isug gafugag el so na nimbeafgelni misog elim ahnai skaufegon. Mangofi ehe afafenig el me amo ehe kifutig el me. So na ehem lahlafeni.

<sup>19</sup> Afa ateamba ne Godum mungo oniginagba afa lahlag gafugafe eso el mungwinim nem tautig faigbi afa ne ismunagim tautig fag. Eba enanai yi God nem lahlafenaf.

<sup>20</sup> Afa ateamba ne amtakwalig nihe esegba eso nem ena nagum tigif eba ne ismunagim tautig fag eba el nem og eheba lahlag el ehe? Amo, el mas enaig esogoi. Afa ne lahlag gafugafegba eso ne ismunagim tautig fag eba God nem lahlafenaf.

<sup>21</sup> Afa Krais nengelim kwaganigim kinig fag eso God nem kanog hwatigba eso ne gaba gwenaig esi. Afa Krais ehe mina wagfug eso ne gwenaig nihe fi.

<sup>22</sup> Afa ehe mas mang wesig fena mo afa ehe mas mwakwal mo sihina mo. *Ais 53:9*

<sup>23</sup> Afa el ehem amtakwalig mo fainibi afa ehe mas mungwag esoni mo. Afa mahim ehe kinig fagba ehe mas mungwag ehengelim enaig



esinigim mo sihini mo. Afa ehe og ka kikeafna onigig gwesim God nai yi wahiaiba eso God eba lahlag kwefihiageg el feg.

<sup>24</sup> Afa mahim el Kraisim li katigeg wa akahlifnibi ehe heafna eligni bigelni amtakwalig mo fani. Afa ehe enaig esegba eso big amtakwalig nihe gwesim wahinim eso lahlag nihe wa saho agfofum. Afa ehe tautig fagba eso enanam bigim lahlafe aitig.

<sup>25</sup> Autunam ne sipsip lofug minam etetiageni afa yawo ne sipsip nangwaghiawagig el nangum ambugogba eso ehe nem nangwaghiagego.

### 3

#### *Ligag angwag nai yi mo*

<sup>1</sup> Afa nengel angwafig so na nimbeafna ligagim ahnai skaufegon. Afa ehe Godna mo higigim kusigba eso ma ehe nengelni nihem nangunim eso ma onigig wahgifi. Afa enamba nengelni mo sihiagim goseg.

<sup>2</sup> Eso ehe nem nangwagi ne Godum ahnai skaufigim afa neana nihe lahlafeg eso ehe gaba ogra Godum pahluku.

<sup>3</sup> Nofeka enaig onigwagi ka kikeafna eligim agiagig afa wapogum kikeagi afa engig aitiagibi ka so lahlag angwafig opuko.

<sup>4</sup> Afa neana lahlag gau so ma olug yi gofi. So na afafeg nihe i afa nengnag augufeg nihe i aitiagi. Eba neana lahlag gau mas amtakwale. Afa enaig nihem eba naho God hugna membeg.

<sup>5</sup> Afa afsug angwafig autunai heafgelni onigig God nai yi wahini enaig esenibi eso

lahlag angwafig opukonam ehe heafgelni ligag bugugum ahnai skaugfegoni.

<sup>6</sup> Afa Sara enaig angwafig feg. Ehe Abrahamna mo higinam pahlukunam afa ehem og ne kana amunai. Afa ne ateamba lahlag nihe esigbi eba ne mas embebefi eba ati ne Sarana luwal fig.

<sup>7</sup> Afa nengel kwamblo nembeafna angwafig i so na lahlag ahagag ahfe. So na enaig onigif angwafig mas kifutig mo eso ne bwata fegon. Afa God ehengelim gaba ismunagim kwaganig afa inim nofkenagag faif. Afa ne enaig esigbi eba mas mang nengelni betenim kaguni.

*Big lahlag nihem esinim eso kinig fi*

<sup>8</sup> Afa kana mo muhwa wahiagim ka ofe. So na mungo onigigna augu i afa elim afafegon afa nilitem membegoni afa elim lahlafehiagi afa ahanaig ahanaig tonbusugum hwati.

<sup>9</sup> Afa el nem amtakwal fiafaiba nofeka mungwag gwenai esena. Afa el nem agi mo faiba nofeka mungwag gwenai esona. Amo, so na Godum sahnibi God so ma ehem lahlafehiage. Afa God nem awamonagim eso ehe nem enaig mo faif.

<sup>10</sup> Afa Godna mo enaig esog;  
Afa aman el membeg oga lahlag auguf afa heafgelni nofkikenagim sifakali.  
Eba ehe so ma amtakwalig mo mi afa mwakwal mo mi wahiyi.

<sup>11</sup> Afa so ehe amtakwalig nihem wahinim afa lahlag nihe wa saho agfohiefi.  
Afa so ma ehe enaig onigif ka so mingnag el i mungwal onigig ahfe

afa so ehe ena minam hugna pahlukui.

<sup>12</sup> Afa Ainiyag lahlag elim nangwaghiagego afa ehe ehengelni sahigim higinig.

Afa ehe amtakwalig elim masig fatinig. *Sam*  
*34:12-16*

<sup>13</sup> Afa so na sifakalna lahlag nihe fef eba aman so nem amtakwale feaitif?

<sup>14</sup> Afa ne lahlag nihe esegba afa enanai yi ne tautig fag so ma God nem lahlafiahfai. Nofeka ehengelim embefinim afa enam hugunam onigkafum.

<sup>15</sup> So na Kraism nimbeafna onigig wa fafatinam afa so na eso ehe kana Ainiyag feg. Afa nimbeafgelni olug onigigim ambagwa sihiagim numwehiagi agfofum. Afa mahim el nem sahinibi so na lahlag sihif.

<sup>16</sup> Afa so na ehengelim nengna mona wahigi sihigoni afa lahlag fegoni. Afa Godna nof wa so na lahlag nihe fi. Afa mahim el nem sehtigibi eba nem nangwagig mahim ne Kraisma elni nihe figbi eso ehengelni mo ehem ahwanifenig.

<sup>17</sup> Afa God enaig esof afa lahlag nihe wa ne kinig fif eba lahlafeg. Afa ne amtakwalig nihe wa kinig fif eba amtakwalig.

*Krais wahagim piske bihiag bigim God nangum wambubug*

<sup>18</sup> Afa Krais bigim wahanigim bigelni amtakwalig hugufatinig afa bigim God nangum wambubug. Afa enag lahlag el amtakwalig elim enaig esenig. Afa ehe mungonagim wahagim afa enag wahag gwenanai yi bo fegba eso amtakwalig hugufatig gafugagim tige fakag. Afa ehe el feg eso

ehem tigifatini afa God ehem ilafu fatigba afa ehe yawo sungwag feg.

<sup>19</sup> Afa ehe enaig gohugum afa kalabus wa nai sungwagim ikag mo sihinig. Afa ehengel elni sungwag.

<sup>20</sup> Afa enanam Noa sipim gafugag ofefenaba afa ehengel Godna mom higigim kusini. Afa God nenge gofena mas ikagna kwefihianugena mo eso ehengelni sungwag ena sungwagni kalabus yi saho ahuna. Afa enanam eba mingnag el sip yi saiyna afa bu wahigi fakanaba eso God enag kug yi gohug elim mungo kwagana.

<sup>21</sup> Afa ehengel bu sisyi agfohie fenaba afa God ehengelim piske wambina. Afa enaba bu wa aitiagim wagfug afa yawo ne bu wa apaigogba afa God nem piske wambug. Afa enaba mang nuhwefum gigiafeg mo amo, eba ne Godum sihi wahianag ka neana nof wa afsug el agfofufe. Afa God Sisas Kraism bitekfe nai ilafu fatig eso enana nem piske wambug.

<sup>22</sup> Afa ehe heven gam ikagim afa Godna nihiginai ningagam ga eso mungwali ofwanai el i afa kifutig nimbasa i afa ahanaig ahanaig kifutig gawig i ehem ahnai skaufinig.

## 4

### *Sa big autunai nihem masig fatini*

<sup>1</sup> Afa Kraism heafna eligni tautig fag eso ne gaba numwehiaginim gwenaig esi. Afa el heafna eligni tautig fagba eso ehe mas ahanaig amtakwalig nihem onigig mo.

<sup>2</sup> Eso ehe ohuna bite wa gohba eso mas bite nai onigig ehem kehla gufi afa ehe Godna sawiegim pahlukug.

<sup>3</sup> Afa nihe afwambanai el so membig autunam ne gwenaiig fena. Afa ehengel so enaig esini aga taitu i afa ahanaig ahanaig membug i afa moiniainig i afa buyis wa sifkalig i afa mwakwal godum oniginig. Afa enaig nihem pahlukuiagba ati ne wahiig.

<sup>4</sup> Afa enag amtakwalig nihe ne masig fatig eso ne mas afwambanai el i wahe enaig esi. Afa ehengel sineminefigim eso nem amtakwalig mo sihigonig.

<sup>5</sup> Afa nengigim God elim kwefihia ofefiba eso ehengel heafgelni mungwali ahanaig ahanaig amtakwalig nihe ambagwa sihiagif. Afa God ati numwehiageg nofkenagag el mi afa melig pigieg el mi kwefihiagegim wahiig.

<sup>6</sup> Eso ehe melig pigieg elim gaba lahlag mo sihini. Eba inim ehengel ati pigi eso gwenaiig mungwali el ahanaig ahanaig fiahgig eba pigif. Afa ehengelni sungwag eba higege gofuf ofenaiba God ehe go.

### *Sa big gawig God bigim faig lahlafe fi*

<sup>7</sup> Afa mungwali gawig ati awaiegim muhwa ofe. Afa so na onigiginim afa numwehiagifum eso ne beteni.

<sup>8</sup> Afa so na mingnagim hugna membegon. Son-aig nihe eba naho mingnag nihem gosinig. Afa ne elim membenigbi enag eba enaksag amtakwalig nihem hwatigim eso ne mas mungwag esini.

<sup>9</sup> Afa so na Godna elim nimbeafna lala gam wanikiafum afa nofeka enam wagni.

<sup>10</sup> Afa God nem ahanaig ahanaig kifutig mungwali nem mimageni. So na enag numwehe lahlafinim afa enag kifutig God nem faig eso Godna mingnag elim kwaganim.

<sup>11</sup> Afa aman Godna mo sihiag el feg so na mo sihig ena mo God heafna mo lofeg. Afa aman kwegfwag el sofeg eso Godna kifutig yi enaig ese. Eso el nengelni mungwali gafugagim nangwaginim afa Sisas Kraisna unehlag wa Godum fingi fif. Afa nalig unehlag i afa nalig kifutig i eba heafna feg afa enaba higeg gofuf. Enaba inim.

*Afa bigel Krais lofug kinig figbi eso big sifakali*

<sup>12</sup> Afa kana hihe, mahim enag kinig nem gihnigbi nofeka sineminefi eba mang mulug mo.

<sup>13</sup> Krais kinig ati kahlagba eso ne gaba gwenaig esinim eso enam sifakalini. Afa nengigim heafna nalig unehlag ambagwa puguiba eso ne hugna sifakalif.

<sup>14</sup> Afa ne Kraisna el fig ma nem el amtakwalig mo sihigonibi so na sifakali. Afa enaba enaig wagfug feg Godna Sungwag nengel nai yi go. Afa enag Sungwagbi eba nalig unehlag nai yi kifutig nai yi feg.

<sup>15</sup> Nofeka ne elim tigifati, afa gawig okwefi, afa ahanaig ahanaig mingnag nihe fi, afa nofeka minatitenai el lofi. Masa ne enanai yi kinig fafe.

<sup>16</sup> Afa ne Kraisim pahlugugba eso enanai yi kinig ne fig eba nofeka enam ahwanifi. So na Godum lahlag oni eba ati ne Kraisna unehlag na fig.

<sup>17</sup> Afa Godna kwefihiawagig osuna muhwa ofe afa so ehe heafna elim enanam gof gam esenif. Afa ehe bigim gof gam esofenifuf eba sumi yi gaba el ehena lahlag mom masig fatig ehe ehengelim hugna amtakwalig esenif.

<sup>18</sup> Afa Godna mo enaig esog; Afa ateamba lahlag el Godna mina gam kinig fagba eso God ehem suliafag afa so ahanaig amtakwalig elimbi pugunif? *Snd 11:31*

<sup>19</sup> Afa ateamba Godna sawieg wa mingnag el kinig figbi eso ehengel lahlag nihe esibi eso enaba wafug hefum Godna ninga wa wahig. Afa God elim esenaiba eso heafna mo sihi wahiagim lahlafafaf.

## 5

### *Siosna misog elni mo*

<sup>1</sup> Afa koka nem siosna misog elim mo sihinuge. Ka gaba siosna misog el feg. Afa mahim Kraiis tautig fagba eso kikeafna nofna ka nangug. Afa mahim Kraiisna nalig unehlag ambagwa puguiba eso ka gaba lahlag heafna fafe. Noso ka nem enaig sihifenig.

<sup>2</sup> Afa so na Godna sipsipim numwehe nangwaghiagi eso ehe ehengelim nengelni ninga wa hwatig. Afa enag gafugagba nimbeafna membug wa so na esi afa God enaig onigig membeg masa el nem hekusihiagif. Nofeka kig fag onigigna gafugafi amo so na Godna elim oniginim eso gafugafi. Ehengel eba sipsip lofug.

<sup>3</sup> Afa nofeka misog el lofinim afa Godna elim mo piga wambwaigo. Nofeka enaig esi. God

ehengelim nengelni ninga wa hwatiba eso ne lahlag mina wagfugonibi so ma enag sipsip ena mina pahlukui.

<sup>4</sup> Afa mahim sipsipni nangwaghiawagig elni misog el ambagwa puguiba eso ne lahlag nemug gau fif ena gau mas amtakwale.

<sup>5</sup> Afa nengel kwablog el so na gaba misog elim ahnai skaufegon. Afa ne mungwali nimbefum ahnai skaufeaginim. Afa Godna mo enaig esog; God tutonbusug elim pigawampif. Afa el so hefum sugupeg eba God ehem lahlafenif.  
*Snd 3:34*

<sup>6</sup> Eso ne Godna kifutigim ahnai skaugfini afa osuna so ehe eso wahiag, enanam ehe nem fingi fef.

<sup>7</sup> Afa God nem hugna afafenig eso nimbeafgelni kinig heafna ninga wa wahiya.

<sup>8</sup> So na numwehiaginim afa nof fiahgifibi. Afa Satan nengelni angoluweg eba ofenaiba laion\* euaka ogra elim tige ne.

<sup>9</sup> Afa ne anwanafig mungwali ohuna bite wa nengelni kristen nilite gwenaig kinig fig eso nengelni olug onigig kifutig gofiba afa Satanim fingi fati.

<sup>10</sup> Afa ne Sisas Kraism olug oniginibi eso yuwana God nem afafenigim awamona so na heafna lahlag gawig wa higege ahagag fif. Afa kinig so na fag eba mwakwalig gofe afa sumi yi God ehe nem piske lahla fiafanam eso nem kifutig na geba eso ne kifutig gofuf.

---

\* **5:8:** (5:8) Laion eba kifutig sis sangwalinai pusi lofug.



<sup>11</sup> Na Godna unehlagim fingi fi eso ehe nalog kifutigni higeg gofuf. Eba inim feg.

*Pitana sumi yi mo*

<sup>12</sup> Afa ohuna wesig ginofba Sailas kam kwegfug ginofeg. Afa ka anwanafeg ehe bigelni lahlag nilite. Kog ka nem kifutinuge na ka enaig esog ohuna ginof eba Godna lahlag kwegfwag wagfug. So na ohuna mo kikehlanam kifutig gofum.

<sup>13</sup> Afa Babilon wa nai sios el nengelim enaig esogog ka mas nem etetigoni. Afa God ehengelim gaba kanog hwatig. Afa Mak ofenaiba kana luwal ehe nem gwenaig esonig.

<sup>14</sup> Afa mingnagim nilitem so na kikigeahiagi enaba wagfug ne kristen nilitem hugna membe-gonig. Ne mungwali Kraisna el fi so ma nem olug efihlag gohoni.

**Godna mo Awai mona go**  
**The New Testament in the Naineri dialect of the**  
**Amanab language of Papua New Guinea**  
**Nupela Testamen long tokples Amanab (Naineri) long**  
**Niugini**

copyright © 2011 Wycliffe Bible Translators, Inc.

Language: Amanab (Naineri) (Amanab)

Dialect: Naineri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

---

PDF generated using Haiola and XeLaTeX on 28 Dec 2024 from source files dated 31 Aug 2023

706c7f8d-4ad4-57ee-a662-e3538519cff8